

AKASHVANI AIZAWL

REGIONAL NEWS UNIT

REGIONAL NEWS BULLETIN

(MIDDAY)

Tuesday, October 7, 2025

Time - 2:30pm - 2:35pm



CM

Chief Minister Pu Lalduhoma'n Criminal Law thar pathum leh Inter operable Criminal Justice System tha taka kalpui a nih theih nan Directorate of Prosecution din turin chak takin hma an la tih a sawi.

He thu hi vawiina Law & Judicial buatsaih Training for Government Advocates/Public Prosecutors & Nodal Officers of Court Cases, I&PR Auditorium-a buatsaih a hmanpui na ah sawiin Chief Minister chuan Sorkar Ukil te chu sorkar tana inhlawha court-a ding thin an ni satliah lo a ti a, dikna vawnghimtu, mipui sorkara mipui aw, mipui leh sorkar chanvo vengtu leh haichhuah saktu an ni tih sawiin Court-a sorkar aw an nih avangin mi dik lote hmaa tlawm duh ngai lo nun nei turin a chah a ni.

Pu Lalduhoma chuan sawrkar chak ngei ngeina tur nia an ngaih case thenkhatah delay a awm avanga sorkar tanhmun a chhiat phanna a thleng thin chu pawl atih thu sawiin case ngaihthah avanga sorkarin harsatna an tawh ang chu thleng nawn tawh lo se a duh thu a sawi.

Vawiina hun hmanah hian District hrang hrang atanga lo kal khawm sorkar ukil te leh Court case awmna department-a Nodal Officer te an tel a ni.



ICT MINISTER

ICT Minister Dr Vanlalhlana'n vawiin khan Union Minister of Electronics and Information Technology Pu Ashwini Vaishnaw hmu in Mizorama IT hub din a nih theih nan leh IT incubation centre kalpui a nih theih nan Mizorama Software Technology Park of India (STPI) changtlung tak din an mamawh thu a thlen.

New Delhi-a India Mobile Congress (IMC) 2025-a tel tura thang mek Information & Communication Technology Minister Dr Vanlalhlana hian Union Minister Pu Ashwini Vaishnaw chu a pisa ah a hmu a, ICT Minister Dr Vanlalhlana chuan Mizorama Software Technology Park of India (STPI) changtlung zawka din vat a nih theih nan MeITY Minister chu hma lakpui turin a ngen a. Mizoramin human resource an neih that thu leh digital literacy-a an sanna chu tangkai zawka hman a nih theih dan tur a sawipui a. Rei lo tea Mizoram Engineering College (MEC)-a class tan tura Mizoram Sawrkar hmalakna leh National Institute of Technology (NIT) Mizoram campus, Lengpuia din tur pawh hun rei tak chhunga chawlh a nih hnuah hna thawh chhonzawm leh thuai a nih tur thu a sawi lang a. Mizorama IT hub din a nih theih nan leh software export leh IT incubation centre kalpui a nih theih nan STPI changtlung tak chu Mizoram mamawh a nih thu Union Minister of Electronics and Information Technology chu a hrilh bawk.

Mizorama STPI centre neih mek chuan Ch. Chhunga Bus Terminal Building, Thuampaia mi luahin kum 2018 atanga din tan a ni a. Centre of Entrepreneurs (CoE) kalpuiin gaming leh entertainment bikah bul tan tirt hma a lakpui thin a ni. STPI hi India rama IT a than zel nana din niin India ramah a inzarh pharh mek a, State leh UT zawng zawngah din kim a la ni lo a ni.

STPI din dan tur mumal zawk leh changtlung taka din a nih theih nan ICT Minister Dr Vanlalhlana chuan Sawrkar Laipui Ministry hi a dawr a. MeITY Minister chuan Mizorama hmunhma awmte a hmuna an en vat tur thu lo hrilhin a rang hma lakpui theih ngei a beisei thu a sawi.



COMMERCE & INDUSTRY MINISTER

Commerce & Industries Minister Pu F. Rodingliana chuan vawiin khan Vanapa Hall-ah ‘The Industrial and Investment Policy of Mizoram, 2025’ leh ‘The Mizoram Procurement Preference Policy for MSEs, 2025’ a tlangzarh a; sorkar chu mipui tana din a nih avangin mipui tana sorkar a inpek tam pauh leh sorkar chu a hlawhtling tihna a nih thu a sawi.

Pu F Rodingliana chuan Mizote zingah mahni siam ngaihsan lohna a lian thin tih a sawi a, vawiinah chuan mahni thar ngaihsan leh ngaihhlut thiam a tul thu a sawi a; industry chu Mizoram din chhuahna tur pawimawh tak a nih avangin ZPM sorkar chuan industry hi an ngaihpawimawh thu leh tuna policy pahnih tlangzarh tâk pawh hi industry dintute tana hmasawna tur a nih thu a sawi.

Industry din duh taktakte tan hma an la tih sawiin Pu F Rodingliana chuan, industry din duhtute hnenah ram an pe ang a, policy-in an umzui ang a, pension awm lo, tu leh fate thlenga eizawna ngialnghet insiamna tur atan kawng an hawn thu a sawi.

Lengtêah leh Luangmualah te plot an siamthat mek thu sawiin Commerce & Industries Minister chuan, industry ramah ram âwl a tam thu leh industry din duhte tana ram an zawnin a ram neitu an lo awm zel thu a sawi.

The Mizoram Procurement Preference Policy for MSEs, 2025 hmang hian Mizoram sorkar chuan Mizoram chhunga industry dintu emaw, thilsiamtu/service petute thil siam chhuah chu a leisak thin dawn a, hemi tur hian policy hnuaiyah inziahluh a ngai a ni. Policy hnuaiyah inziaklutte hian inziaklut ve lote aiin sorkara thil an hralh turah za zela 12% china an chhanna a san zawk pawhin duhsakna pek zawk a ni dawn a, bungrua/service lei tum sorkar departmentte chuan kum khat chhunga an thil lei tur zawng zawng atanga 25% chu he policy hnuaiyah inziaklutte hnen atangin an lei ngei a ngai bawk.



END

Excise & Narcotics Department chhinchhiah danin kumin 2025-ah hian nimin October ni 6 thleng khan Mizoramah ruihhlo vangin mi 65 an thi tawh a, ruihhlo vanga thi zingah hian heroin (No.4) vanga thi 24 awmin an tam ber.

Excise & Narcotics Department-in report an dawn chinah kumin January 1 atanga nimin October 6 thleng khan ruihhlo vangin mi 65 an thi a, heng zinga 54 hi mipa niin, hmeichhia 11 an awm bawk. Ruihhlo vanga thi mi 65 zinga 24 hi heroin (No.4) ti thin an ni a, abak mi 41-te hi ruihhlo chi khat aia tam tihpawlh thinte an ni. Kumina ruihhlo vanga thi mi 65-te hi kum 19 - 57 inkara upa an ni.

Excise & Narcotics Department hian Mizorama ruihhlo vanga thi zat hi kum 1984 atang khan a chhinchhiah tan a, kumin October ni 6 thleng khan kum 42 chhungin ruihhlo vanga thi mi 1944 an awm a, mipa 1,707 leh hmeichhia 237 an ni. Kum 42 chhunga ruihhlo vanga thi mi 1,944 te hi Proxyvon ti thin mi 1,161, heroin ti thin mi 296 leh ruihhlo chi khat aia tam tihpawlh thin mi 487 an ni.



PM MODI ON GST

Prime Minister Narendra Modi a'n thla hmasa ni 22 a GST rate thar apuan chuan mipui te ah hlawkna a thlen mek a, vawiin ah chuan Maharashtra ei leh bar a nghawng dan kan tarlang dawn a ni.

Ei leh bar leh thil siamchhuahna leh siamna hmupui Maharashtra chuan GST dan thar hian nasa tak in hlawkna a siamsak dawn a, loneitute, kut hnathawktute leh sumdawanna lianlo te tan hmasawanna a thlen dawn a, sum thawhchhuah leh hralhchhuah kawng ah a hma aiin hmasawanna hmuh beisei a ni.

